

25

Pravosudna komisija Brčko distrikta Bosne i Hercegovine, na osnovu odredbe člana 71 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), odredbe člana 14 Zakona o Pravosudnoj komisiji Brčko distrikta Bosne i Hercegovine (Službeni glasnik Brčko distrikta Bosne i Hercegovine, br.: 19/07, 20/07 i 2/08) i odredbi članova 77 stava 4 i 297 stava 1 tačka e) Zakona o stečaju (Službeni glasnik Brčko distrikta Bosne i Hercegovine, broj 16/19), na 210. redovnoj sjednici, održanoj 19. 11. 2019. godine, donosi

**PRAVILNIK
O NAKNADAMA I NAGRADAMA ZA RAD STEČAJNOG
UPRAVNIKA I ČLANOVA ODBORA POVJERILACA**

Član 1

(Predmet Pravilnika)

Ovim pravilnikom propisuju se kriteriji i način obračuna naknada i nagrada za rad stečajnim upravnicima, privremenim stečajnim upravnicima, povjerenicima, članovima odbora povjerilaca i drugim angažovanim licima za obavljanje poslova u predstečajnom postupku, prethodnom stečajnom postupku i stečajnom postupku.

Član 2

(Naknada i nagrada za rad)

- (1) Naknada je novčana nadoknada za materijalne troškove (kao što su: troškovi prevoza, dnevnica, troškovi smještaja i sl.), koje su stečajni upravnici, privremeni stečajni upravnici, povjerenici i članovi odbora povjerilaca imali u toku postupka.
- (2) Nagrada je novčana nadoknada za rad stečajnih upravnika, privremenih stečajnih upravnika, povjerenika i članova odbora povjerilaca u toku postupka.

Član 3

(Isplata naknade i nagrade za rad)

- (1) Stečajni upravnik, privremeni stečajni upravnik, povjerenik i članovi odbora povjerilaca primaju naknadu i nagradu za obavljene poslove u toku postupka u kojem su imenovani.
- (2) Naknadu i nagradu za obavljene poslove određuje stečajni sudija u skladu s ovim pravilnikom, nakon što stečajni upravnik, privremeni stečajni upravnik, odnosno povjerenik:
 - a) završe sve poslove za koje su imenovani,
 - b) dostave izvještaj o izvršenom poslu,
 - c) dostave izvještaj o troškovima postupka,
 - d) dostave obrazložen zahtjev za isplatu naknade i nagrade svojih troškova u skladu sa Zakonom o stečaju (u daljnjem tekstu: Zakon).
- (3) Obrazložen zahtjev za obračun naknade i nagrade stečajni upravnik, privremeni stečajni upravnik, odnosno povjerenik dostavlja sudu zajedno s prijedlogom za glavnu diobu.
- (4) Prije donošenja odluke o troškovima postupka stečajni sudija može odrediti reviziju materijalno-finansijskog poslovanja stečajnog dužnika u stečajnim predmetima u kojima je revizija propisana Zakonom.

Član 4

(Isplata mjesečnih iznosa nagrade za rad)

- (1) Izuzetno od člana 3 ovog pravilnika, po zahtjevu stečajnog upravnika, privremenog stečajnog upravnika, odnosno povjerenika, kada za to postoje opravdani razlozi, stečajni sudija donosi rješenje kojim se određuje isplata mjesečnih iznosa nagrade.
- (2) Mjesečni iznos nagrade iz stava 1 ovog člana određuje se tako da nije veći od dvije prosječne bruto plate u Brčko distriktu BiH u posljednja tri mjeseca, te da ukupan zbir mjesečnih iznosa nagrada nije veći od ukupnog iznosa nagrade propisane ovim pravilnikom.
- (3) Stečajni sudija određuje mjesečni iznos nagrade u većem iznosu od iznosa navedenog u stavu 2 ovog člana ako:
 - a) stečajni dužnik nastavlja obavljati poslovnu djelatnost tokom stečajnog postupka,
 - b) se vodio ili se vodi postupak reorganizacije,

c) se radi o stečaju sa elementom inostranosti.

- (4) Mjesečni iznos nagrade iz stava 3 ovog člana određuje se tako da nije veći od tri prosječne bruto plate u Brčko distriktu BiH u posljednja tri mjeseca, te da ukupan zbir mjesečnih iznosa nagrada nije veći od ukupnog iznosa nagrade propisane ovim pravilnikom.

Član 5

**(Nagrada za rad povjerenika
u predstečajnom postupku)**

- (1) Povjereniku u predstečajnom postupku za obavljene poslove isplaćuje se osnovna nagrada, u iznosu od 2.000 KM do 20.000 KM.
- (2) Nagradu povjereniku određuje stečajni sudija, vodeći računa o složenosti i obimu poslova koje je obavio.
- (3) Nagradu povjereniku isplaćuje sud iz predumljenih sredstava predstečajnog postupka.
- (4) Na obrazloženi zahtjev povjerenika, stečajni sudija može, ako je sa tim saglasan dužnik, povjereniku odrediti i dodatnu nagradu, koja ne može biti veća od 10.000 KM.
- (5) Dužnik vrši isplatu dodatne nagrade iz stava 4 ovog člana.

Član 6

**(Nagrada za rad privremenog
stečajnog upravnika)**

- (1) Privremenom stečajnom upravniku za poslove obavljene u prethodnom stečajnom postupku isplaćuje se nagrada u iznosu od 500 KM do 5.000 KM.
- (2) Nagradu privremenom stečajnom upravniku određuje stečajni sudija, vodeći računa o složenosti i obimu poslova koje je obavio.
- (3) U slučaju obustavljanja prethodnog stečajnog postupka ili odbijanja prijedloga za otvaranje stečajnog postupka, nagrada se isplaćuje iz predumljenih sredstava za troškove prethodnog stečajnog postupka.
- (4) U slučaju otvaranja stečajnog postupka, nagrada se isplaćuje iz predujma ako su predumljena sredstva dovoljna, a ako predumljena sredstva nisu dovoljna za isplatu, isplatit će se dio nagrade koji je moguć, a ostatak se isplaćuje na teret stečajne mase.

Član 7

(Osnovna nagrada za rad stečajnog upravnika)

- (1) Stečajni sudija rješenjem utvrđuje visinu osnovne nagrade stečajnom upravniku, uzimajući u obzir:
 - a) složenost stečajnog postupka,
 - b) dužinu trajanja postupka,
 - c) stepen namirenja povjerilaca.
- (2) Stečajni sudija može stečajnom upravniku, na njegov obrazloženi zahtjev, odrediti, pored nagrade iz stava 1 ovog člana, dodatnu nagradu.
- (3) Izuzetno od stava 2 ovog člana, stečajni sudija odobrava rješenjem isplatu posebne nagrade stečajnom upravniku prema odluci skupštine povjerilaca u skladu s članom 14 ovog pravilnika.
- (4) Nagrade isplaćene za posebne poslove obavljene u predstečajnom postupku i prethodnom stečajnom postupku ne ulaze u obračun osnovne nagrade stečajnom upravniku.

Član 8

(Visina osnovne nagrade za stečajnog upravnika)

- (1) Osnovna nagrada stečajnom upravniku po osnovu vrijednosti unovčene stečajne mase iznosi najviše 135.000 KM.
- (2) Dodatna nagrada stečajnom upravniku iznosi najviše 1/2 iznosa osnovne nagrade određene u skladu s članom 7 ovog pravilnika.
- (3) Dodatna nagrada stečajnom upravniku neće se isplaćivati ako je vrijednost unovčene stečajne mase do 5.000 KM.
- (4) Nagrada stečajnom upravniku u predmetima u kojima nema stečajne mase za unovčenje određuje se paušalno u iznosu do 1.500 KM i isplaćuje se ako su preostala novčana sredstva iz prethodnog stečajnog postupka ili ih uplate zainteresovana lica (članovi društva, dioničari, povjerioci i druga lica koja nisu u sukobu interesa).

Član 9 (Tarifa za obračun osnovne nagrade stečajnom upravniku)

Osnovna nagrada stečajnom upravniku po osnovu vrijednosti unovčene stečajne mase obračunava se u skladu s Tarifom I, koja se nalazi u prilogu 1 ovog pravilnika i čini njegov sastavni dio.

Član 10 (Dodatna nagrada)

- (1) Stečajni sudija rješenjem utvrđuje visinu dodatne nagrade stečajnom upravniku, uzimajući u obzir:
 - a) složenost stečajnog postupka,
 - b) dužinu trajanja postupka,
 - c) stepen namirenja povjerilaca.
- (2) Ako stečajni sudija utvrdi da su ispunjeni istovremeno svi uslovi iz stava 1 ovog člana, odredit će jedinstvenu dodatnu nagradu, u skladu s članovima 11, 12 i 13 ovog pravilnika s tim da dodatna nagrada neće iznositi više od 1/2 iznosa osnovne nagrade.

Član 11 (Složenost stečajnog postupka)

- (1) Složenost stečajnog postupka određuje stečajni sudija prema:
 - a) broju prijavljenih i ispitanih potraživanja,
 - b) ažuriranosti pravne dokumentacije za imovinu, koja čini stečajnu masu, a koju je tokom stečajnog postupka stečajni upravnik ažurirao,
 - c) povećanju stečajne mase putem pravosnažno usvojenih zahtjeva po pobjinim radnjama,
 - d) pronalazanju nove imovine stečajnog dužnika, koja nije bila evidentirana u knjigovodstvenoj evidenciji stečajnog dužnika u trenutku pokretanja stečajnog postupka ili je imovina iznesena iz kruga stečajnog dužnika i sakrivena, a ako to sve utiče na povećanje stečajne mase,
 - e) pokretanju i održavanju privredne aktivnosti tokom stečajnog postupka i ostvarenjem prihoda iz takvog posla ili stvaranju uslova za bolje unovčenje imovine stečajnog dužnika,
 - f) obavljanju tekućih privrednih aktivnosti na završetku započelih poslova i ostvarenim tekućim prihodima iz kojih se finansiraju troškovi stečajnog postupka,
 - g) ako je sproveden postupak reorganizacije stečajnog dužnika,
 - h) ako je imovina prodana pod uslovom i kupac nastavi djelatnost i zadrži radnike ili dio radnika stečajnog dužnika i ako je odluka kupca ispoštovana,
 - i) ako je stečajni dužnik prodat kao pravno lice, zadržao svoj pravni subjektivitet, nastavio poslovnu djelatnost i zadržao radnike ili dio radnika stečajnog dužnika u radnom odnosu,
 - j) postojanju elemenata inostranosti.
- (2) Na obrazložen zahtjev stečajnog upravnika, osnovna nagrada se uvećava za najmanje 10% a najviše za 40%, ako je po odluci stečajnog sudije ispunjen jedan ili više kriterija iz stava 1 ovog člana.

Član 12 (Trajanje stečajnog postupka)

Osnovna nagrada uvećava se:

- a) za 30% ako u složenom predmetu stečajni upravnik okonča postupak glavne diobe i podnese završni račun u roku od godinu dana od dana otvaranja stečajnog postupka,
- b) za 25% ako u složenom predmetu stečajni upravnik okonča postupak glavne diobe i podnese završni račun u roku od godinu dana do dvije godine od dana otvaranja stečajnog postupka.

Član 13 (Stepen namirenja stečajnih povjerilaca)

- (1) Osnovna nagrada stečajnom upravniku uvećava se za 20% ako su u stečajnom postupku povjerioci namireni u visini najmanje 50%, a najviše 80% od ukupno utvrđenih potraživanja.

- (2) Osnovna nagrada stečajnom upravniku uvećava se za 30% ako su u stečajnom postupku povjerioci namireni u visini preko 80% od ukupno utvrđenih potraživanja.

Član 14 (Posebna nagrada)

- (1) Skupština povjerilaca može na prijedlog odbora povjerilaca, odnosno na prijedlog povjerilaca, ako nije osnovan odbor povjerilaca, na ročištu za diobu donijeti odluku da se iz sredstava predviđenih za namirenje povjerilaca stečajnom upravniku dodijeli posebna nagrada, koja iznosi najviše 10.000 KM,
- (2) Skupština povjerilaca može na prijedlog odbora povjerilaca, odnosno na prijedlog povjerilaca, ako nije osnovan odbor povjerilaca, donijeti odluku da se stečajnom upravniku dodijeli posebna nagrada, koja iznosi najviše 15.000 KM u stečajnim postupcima u kojima je uspješno izvršena:
 - a) reorganizacija ili
 - b) uspješna prodaja imovine pod posebnim uslovima ili
 - c) prodaja stečajnog dužnika kao pravnog lica, te je nastavljena poslovna djelatnost i zadržani su na radu radnici stečajnog dužnika ili znatan dio radnika.
- (3) Stečajni sudija u slučaju iz stava 1 ovog člana odobrava isplatu posebne nagrade.
- (4) Posebna nagrada se odobrava stečajnom upravniku iako je stečajni sudija odredio dodatnu nagradu u skladu sa članom 8 stavom 2 ovog pravilnika.

Član 15 (Nagrada u slučaju namirenja razlučnih povjerilaca)

- (1) U slučaju da stečajni upravnik vrši prodaju imovine koja pripada razlučnom povjeriocu, osnovicu za obračun nagrade kod namirenja razlučnih povjerilaca čine sredstva ostvarena prodajom imovine, koja je predmet obezbjeđenja, umanjena za troškove prodaje.
- (2) Osnovica iz stava 1 ovog člana određuje se posebno za svaki dio imovine koji je predmet obezbjeđenja.
- (3) Osnovica se određuje zajednički za više dijelova imovine, koji se prodaju kao imovinska cjelina ili su istorodni, te se prodaju na istoj prodaji ili na više prodaja u istom danu.
- (4) U slučaju iz stava 3 ovog člana, nagrada se isplaćuje iz ostvarenih sredstava prodajom imovine, koja pripada određenom razlučnom povjeriocu srazmjerno učešću procijenjene vrijednosti dijelova imovine, koji su predmet obezbjeđenja u korist tog povjerioca u odnosu na ukupnu procijenjenu vrijednost svih dijelova imovine za koje se osnovica određuje zajednički.
- (5) Kada se prilikom prodaje može utvrditi procijena cijena za pojedinačne dijelove imovine, koristi se srazmjera između ostvarene cijene za taj dio imovine u odnosu na ukupnu ostvarenu cijenu za sve dijelove imovine za koje se imovina utvrđuje zajednički.
- (6) Nagrada stečajnom upravniku i troškovi prodaje odbijaju se od sredstava ostvarenih prodajom imovine, koja je predmet obezbjeđenja prije namirenja razlučnih povjerilaca.

Član 16 (Tarifa za obračun nagrade stečajnom upravniku kod namirenja razlučnih povjerilaca)

Obračun nagrade za stečajnog upravnika kod namirenja razlučnih povjerilaca vrši se u skladu s Tarifom II, koja se nalazi u prilogu 2 ovog pravilnika, koji čine njegov sastavni dio.

Član 17 (Umanjenje nagrade stečajnom upravniku)

- (1) Obrazložen zahtjev za umanjeње nagrade stečajnom upravniku stečajnom sudiji podnose:
 - a) odbor povjerilaca, ako je odbor osnovan,
 - b) skupština povjerilaca, ako nije osnovan odbor povjerilaca,
 - c) razlučni povjerioci.
- (2) Zahtjev iz stava 1 ovog člana podnosi se u roku od osam dana od dana uvida u zahtjev stečajnog upravnika za isplatu nagrade.

- (3) Stečajni sudija po zahtjevu za umanjenje nagrade stečajnom upravniku donosi odluku u roku od petnaest (15) dana od dana prijema zahtjeva iz stava 1 ovog člana ili najkasnije prije donošenja rješenja o davanju saglasnosti za glavnu diobu.
- (4) Stečajni sudija donosi odluku kojom srazmjerno umanjuje nagradu utvrđenu u skladu s ovim pravilnikom ako utvrdi da je stečajni upravnik svojim radnjama oštetio interese povjerilaca.
- (5) Stečajni sudija na zahtjev predlagača iz stava 1 ovog člana, u skladu s ovim pravilnikom, umanjuje nagradu za 20% ako stečajni postupak traje duže od dvije godine.
- (6) Stečajni sudija ne umanjuje nagradu na način iz stava 5 ovog člana ukoliko, na osnovu pismenog obrazloženja stečajnog upravnika, utvrdi da je dužina trajanja postupka opravdana usljed složenosti stečajnog postupka, nepostojanja validne dokumentacije o svojim imovine, vođenja sudskih i upravnih postupaka koji nisu okončani, promjene stečajnog upravnika i drugih objektivnih okolnosti na koje stečajni upravnik nije mogao da utiče, uključujući i postupanje drugih organa.

Član 18

(Nagrada kod promjene stečajnog upravnika)

Ako do promjene stečajnog upravnika dođe iz opravdanih razloga, stečajni sudija rješenjem stečajnom upravniku određuje nagradu srazmjerno obavljenim poslovima u stečajnom postupku.

Član 19

(Nagrada stečajnom upravniku u postupku reorganizacije)

- (1) Ako je stečajni postupak okončan obustavom postupka nakon prihvatanja stečajnog plana, nagrada stečajnom upravniku određuje se prema Tarifi I iz člana 9 ovog pravilnika.
- (2) Ako je reorganizacija stečajnog dužnika okončana u roku i uspješna po stečajnog dužnika i povjerioce, stečajni sudija određuje stečajnom upravniku posebnu nagradu propisanu ovim pravilnikom.
- (3) Ako stečajni plan nije prihvaćen i ako se nad dužnikom sprovodi stečajni postupak, nagrada za rad stečajnog upravnika obračunava se na način propisan za obračun nagrade u stečajnom postupku.
- (4) Ako u postupku reorganizacije nije unovčena stečajna masa, koja bi bila osnovica za određivanje nagrade, nego su stečajnim planom predviđene finansijske mjere reorganizacije ili statusne promjene ili druge mjere predviđene Zakonom, koji ne sadrže unovčenje imovine, osnovica za obračun nagrade iz stava 1 ovog člana procijenjena je vrijednost imovine stečajnog dužnika.
- (5) Ako je u postupku reorganizacije unovčena imovina, osnovica za obračun nagrade za rad stečajnog upravnika je vrijednost unovčene imovine.

Član 20

(Nagrada stečajnom upravniku za provođenje nadzora nad stečajnim planom)

- (1) Za nadzor nad sprovođenjem stečajnog plana stečajnom upravniku se isplaćuje nagrada u iznosu od 2.000 KM do 10.000 KM, za svaku godinu nadzora u zavisnosti od složenosti poslova koje obavlja.
- (2) Isplate nagrade iz stava 1 ovog člana vrši reorganizovano privredno društvo.

Član 21

(Nagrada stečajnom upravniku kod naknadne diobe i prodaje stečajnog dužnika kao pravnog lica)

- (1) Ako se stečajni postupak nastavlja radi naknadne diobe ili se sprovodi nad imovinom stečajnog dužnika koji je prodat kao pravno lice, stečajnom upravniku određuje se nagrada u skladu s Tarifom I iz člana 9 ovog pravilnika.
- (2) Osnovica za utvrđivanje nagrade iz stava 1 ovog člana je novčani iznos koji je isplaćen naknadnom diobom povjeriocima, odnosno ostvarena vrijednost kod prodaje stečajnog dužnika kao pravnog lica.

Član 22

(Nagrada članovima odbora povjerilaca)

- (1) Članovima odbora povjerilaca visinu nagrade određuje stečajni sudija, uzimajući u obzir obim posla, složenost postupka i vrijednost stečajne mase.
- (2) Visina nagrade iz stava 1 ovog člana iznosi od 50 KM do 200 KM po održanoj sjednici, na kojoj je prisustvovao član odbora povjerilaca, a predsjedniku odbora povjerilaca od 80 KM do 250 KM po održanoj sjednici članova odbora povjerilaca.
- (3) Stečajni sudija može članovima odbora povjerilaca nagradu iz stava 2 ovog člana uvećati do 1/2 iznosa utvrđene nagrade, u uspješno okončanim stečajnim postupcima i uspješnim postupcima reorganizacije, te u stečajnim postupcima u kojima je vrijednost unovčene stečajne mase preko 10.000 KM.
- (4) Uvećanje nagrade iz stava 3 ovog člana članovima odbora povjerilaca isplaćuje se nakon izvršene diobe, odnosno naknadne diobe.

Član 23

(Plaćanje poreza, doprinosa i drugih naknada)

- (1) Isplata svih novčanih iznosa nagrada u skladu s ovim pravilnikom su bruto iznosi, koji obuhvataju iznose poreza, doprinosa i drugih naknada po osnovu ovih primanja, u skladu s propisima kojim se uređuje ova oblast.

Član 24

(Naknada troškova u postupku)

- (1) Stečajnom upravniku isplaćuje se naknada svih troškova koji su bili neophodni i direktno povezani s konkretnim stečajnim postupkom, i to putnih troškova, dnevnica, troškova smještaja u skladu s Pravilnikom o visini i načinu obračuna naknada troškova službenog putovanja u institucijama pravosuđa Brčko distrikta BiH. Uz obrazloženi zahtjev za isplatu naknade stečajni upravnik dostavlja sudu i odboru povjerilaca relevantnu dokumentaciju o stvorenim troškovima (putne naloge, račune, pozive za ročišta, saglasnost povjerilačkih organa u slučajevima kada je takva saglasnost potrebna i sl.).
- (2) Članovima odbora povjerilaca isplaćuje se naknada u skladu s odredbom stava 1 ovog člana.

Član 25

(Nagrade angažovanim stručnim licima za potrebe postupka)

- (1) Visina nagrade angažovanim stručnim licima za potrebe konkretnog postupka (vještaka, revizora, advokata i dr.) određuje se prema važećim tarifama o nagradama i naknadama za rad tih stručnjaka.
- (2) Visina plata i naknada za angažovane radnike za obavljanje poslova u stečajnom postupku određuje se u skladu sa Zakonom.

Član 26

(Primjena Pravilnika)

Naknada i nagrada stečajnim upravicima, privremenim stečajnim upravicima, povjerenicima, članovima odbora povjerilaca i drugim angažovanim licima za obavljanje poslova u započetim predstečajnim postupcima, prethodnom stečajnom postupku i stečajnom postupku obračunat će se prema propisima koji su bili na snazi kada su ti postupci počeli.

Član 27

(Stupanje na snagu)

Ovaj pravilnik stupa na snagu danom donošenja i objavit će se u Službenom glasniku Brčko distrikta BiH.

Broj: SuPK- 03-1871/19
Brčko, 19. 11. 2019. godine

PREDSJEDNIK
PRAVOSUDNE KOMISIJE
Šafet Pizović, s. r.

PRILOG 1**Tarifa I**

Osnovica za obračun nagrade stečajnom upravniku prema vrijednosti stečajne mase

Obračun osnovne nagrade u skladu s članom 7 stavom 1 ovog pravilnika:

R. br.	Osnovica za obračun	Osnovna nagrada u bruto iznosu
1.	do 5.000 KM	Ukupna nagrada može iznositi najviše do 5.000 KM
2.	od 5.001 KM do 50.000 KM	Ukupna nagrada može iznositi najviše do 10.000 KM
3.	od 50.001 KM do 100.000 KM	Ukupna nagrada može iznositi najviše do 15.000 KM
4.	od 100.001 KM do 200.000 KM	Ukupna nagrada može iznositi najviše do 24.000 KM
5.	od 200.001 KM do 500.000 KM	Ukupna nagrada može iznositi najviše do 50.000 KM
6.	od 500.001 KM do 1.000.000 KM	Ukupna nagrada može iznositi najviše do 60.000 KM
7.	od 1.000.001 KM do 2.000.000 KM	Ukupna nagrada može iznositi najviše do 80.000 KM
8.	od 2.000.001 KM do 3.000.000 KM	Ukupna nagrada može iznositi najviše do 90.000 KM
9.	od 3.000.001 KM do 10.000.000 KM	Ukupna nagrada može iznositi najviše do 110.000 KM
10.	od 10.000.001 KM do 50.000.000 KM	Ukupna nagrada može iznositi najviše do 120.000 KM
11.	preko 50.000.000 KM	Ukupna nagrada može iznositi najviše do 135.000 KM

PRILOG 2**Tarifa II**

Osnovica za obračun nagrade stečajnom upravniku kod namirenja razlučnih povjerilaca

Obračun nagrade stečajnom upravniku kod namirenja razlučnih povjerilaca u skladu s članom 15 ovog pravilnika

R. br.	Osnovica za obračun	Osnovna nagrada u bruto iznosu
1.	do 200.000 KM	Ukupna nagrada može iznositi najviše do 10.000 KM
2.	od 200.001 KM do 1.000.000 KM	Ukupna nagrada može iznositi najviše do 30.000 KM
3.	od 1.000.001 KM do 2.000.000 KM	Ukupna nagrada može iznositi najviše do 40.000 KM
4.	od 2.000.001 KM do 10.000.000 KM	Ukupna nagrada može iznositi najviše do 60.000 KM
5.	preko 10.000.000 KM	Ukupna nagrada može iznositi najviše do 70.000 KM

26

Pravosudna komisija Brčko distrikta Bosne i Hercegovine, na osnovu odredbe člana 71 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), odredbe člana 14 Zakona o Pravosudnoj komisiji Brčko distrikta Bosne i Hercegovine (Službeni glasnik Brčko distrikta Bosne i Hercegovine, br. 19/07, 20/07 i 2/08) i odredbi članova 23 stava 2, 49 stava 3 i 58 stava 1 tačke a) Zakona o likvidacionom postupku (Službeni glasnik Brčko distrikta Bosne i Hercegovine, broj 16/19), na 210. redovnoj sjednici, održanoj 19. 11. 2019. godine, donosi

**PRAVILNIK
O IZGLEDU I SADRŽAJU OBRASCA PRIJEDLOGA ZA
POKRETANJE LIKVIDACIONOG POSTUPKA I O IZGLEDU
I SADRŽAJU OBRASCA PRIJEDLOGA ZA POKRETANJE
SKRAĆENOG DOBROVOLJNOG LIKVIDACIONOG
POSTUPKA I IZJAVE ČLANOVA DRUŠTVA**

Član 1

Ovim pravilnikom propisuju se izgled i sadržaj obrasca prijedloga za pokretanje likvidacionog postupka i izgled i sadržaj obrasca prijedloga za pokretanje skraćenog dobrovoljnog likvidacionog postupka i izjave članova društva.

Član 2

Likvidacioni postupak, u skladu sa zakonom, pokreće se prijedlogom:

- a) dužnika i
- b) nadležnog organa.

Član 3

Izgled i sadržaj Obrasca prijedloga za pokretanje likvidacionog postupka dat je na obrascu u prilogu koji čini sastavni dio ovog pravilnika.